



telšiū panuorama



Bovusi senuoji Telšiū Torgaus aikštė šėndėin

(Atkelta iš 7 p.)

statīts giedas stols őr irėngts ešafuots.

1873 m. Telšiūs ikorta aukštuoji (universitetėnė) židū rabinu muokikla „Ješiva“.

1871–1874 m. pru Telšiū miesta bona nutėista geležinkelė Šiaulė–Lėipuojė atšaka.

XX a. pradiuo Milevičė Pelėksos Telšiūs suorganiza-va chuora, Narutavičienė išteigė mergėtiu muokiklā, katrā 1912 m. bova suteikts pruogimnazėjės statusos.

1907 m. rogpjūtė 2 d. Telšiūs, prie Mastė ežera, bo- vusiuos kareivėnies, ivėka lietovėšks vakars, katramė bova suvaidintas pjesės „Vel's spāstūs“, „Žėlė galvuo – vel's oudėguo“.

1915 m. Telšiūs isteigta lietoviu pruogimnazėjė.

1915–1918 m. miestė šeimininkava kaizerėnės Vuokītėjės kariuomenė. Kara laiko miestė gīventuoju so- mažiejė aple 30 pruocėntu.

1916–1940 m. Telšiūs veikė „Kankliu“ draugėjė.

1918 m. bova ikorta berniuku „Saulės“ draugėjės gimnazėjė, katra 1925 m. bova pavadinta Vīskopa Muo- tiejaus Valončiaus vardo.

1921 m. Telšiūs isteigts Cėntrėnės valstībėnės bėb- liuotekas skīrios.

1922 m. spalė 2 d. Telšiūs pradiejė veikti mokītuuju semėnarėjė, nu 1953 m. ana vadėnuos pedaguogėnė muokikla (anuos veikla nutraukta 1957 m.).

1923 m. Telšiū mieste bova aple 4 690 gīventuoju.

1925 m. Telšiūs bova isteigts Muotiejaus Valončiaus liaudės universitets.

1926 m. balondė 1 d. puopiežius Pijus XI isteigė Lietovuos bažnītėnė pruovincėjė. Tumet bova suformouta beveik vėsa etnėnė Žemaitėjė apėmonti Telšiū vīsku-



Telšiū Švč. Mergelės Marijės Jiemėma i dongo (Mažuoji) bažnīčė

pėjė, kuruos centro tapa Telšė. Tās metās pru Telšius nutėista Telšiū-Amaliū geležinkelė lėnėjė, katra Telšius sojungė soauno ėr kėtās artėmiausės pramuonės, kultūras ėr švėitėmo cėntrās.

1927 m. spalė 4 d. atėdarīta Telšiū vīskupėjės konėgū semėnarėjė (ontruoji aukštuoji muokīkla Telšiūs).

1928 m. Telšiū vīskupėjės konėgū semėnarėjė bova pastatītė erdvė rūmā, Telšiūs pradiejė veiktė spauslovė.

1929 m. Telšiūs pastatītė Vīskupū rūmā (vīskupėjės kurėjės pastats).

1922–1930 m. Telšiūs veikė mokītuojū semėnarėjė. 1944 m. anuos veikla bova atkorta.

1931 m. Telšems soteiktas pėrmaeilė miesta teisės, isteigta Žemaitiu senuovės miegieju draugėjė „Alka“, pastatīts fabrėks „Mastis“.

1931 m. rogpjūtė 5 d. Lietovuos švėitėma ministra isakīmo ikorta Telšiū medė apdėrbėma vėdorėnė muokīkla, katra vieliau pavadinata Amatū muokīklo.

1925–1933 m. Telšė bova Žemaitėjės spaudos centros. Čė bova leidams „Žemaičių prietelius“, „Žemaitis“, „Telšių naujienos“, „Spauda ir gyvenimas“, „Ligonijų kasų narys“, „Telšių žinios“, „Žibintas“, „Mūsų filatelistas“, „Žemaičių žemė“, „Darbo žemaitis“ ėr dar nemažā kėtū leidėniū.

1932 m. Telšiūs veikonti Žemaitiu senuovės miegieju draugėjė „Alka“ isteigė kraštuotīras muziejo (dabar – Žemaitiu muziejos „Alka“).

1932 m. Telšiūs bova 28 gatvės, katrū bendros ilgis – 11,6 km.

1935 m. Telšiūs ikorta Telšiū sklondīma stuotės.

1935–1940 m. pri Mastė ežera pastatīts Žemaitiu muziejos „Alka“ (muziejaus rinkėnė čė bova parkeltė jau 1939 m.).

(Nukelta i 10 p.)



Telšiū panuorama



Telšiū miests. Senėjė pramuonės ĩmuoniū pastatā



Telšiū miests